



Este province a esté reduite par armes sous la puissance des Espaignolz environ l'an nostre Seigneur 1518. sous la conduite de Ferdinand Cortese, lequel l'a gagnée avec grande perte de ses gens : & beaucoup plus grande de consiture des habitans en icelle terre, bataillans pour la liberté de la patrie.

C'est une region abondante en or & argent, car en icelle plusieurs fleuves donnent sablon d'or. Du long le bord de la mer, les habitans font grand profit à prendre huîtres esquelles se trouvent perles. Aussi s'y trouvent plusieurs marez sales, de lesquels l'eau seulement par l'ardeur du Soleil se reduit en tresbon sel. La Casse nommée fistula y croist en tresgrande abondance; semblablement une sorte de fruit qui en leur langue s'appelle Cacao, ressemblant aux amandes, lequel fruit ilz tiennent en tresgrand estime: car d'iceluy ilz font une boisson, fort delicate à leur semblant. La mer du long ceste province comme aussi les fleuves en icelle, rendent poissons en tresgrande affluence. Aussi se trouvent en iceux des Crocodiles, que les habitans mangent; entre lesquels s'en trouve plusieurs qui ont plus de vingt pieds en longueur. C'est un pays fort montaigneux & plein de treshautes roches. En ces regions y a tresgrande diversité de langages; de sorte que les uns n'entendent les autres sans avoir leurs truchemens. Les endroits que les Espaignols ont furni d'habitans, pourra le Lecteur considérer en ceste Table ou Charte. Et premierement Compostelle, où se trouve le siege de l'Evesque & la residence du Conseil Real. Item Colima laquelle ilz appellent Purificationis. Guadalajara ville tres-renommée & chef du Royaume de Gallice neufue. Mechoacan, qui semblablement a siege d'Evesque. Cacamula. La Cité des Anges, ville principale & Evesché. Mexico cité royale, ou, à mieux parler, la Roynie de toutes les villes du nouveau Monde; située au bord d'un lac, ou bien plustost d'un mare: qui plus est, toute l'aire d'icelle ville est marescageuse; de sorte qu'on n'y peut entrer ne sortir sinon par certains ponts. Le lac de ceste ville est d'eau salée, contenant en longueur six lieues, & cinq en largeur. Il ne s'y trouve poisson quelconque, fors des trespetits, lesquels à bonne raison on peut nommer vermiciaux: de la putrefaction d'iceux engendrée par tresgrande chaleur du Soleil en Esté, l'air bien souvent se trouve infecté, & la ville plaine de maladies: & ce pendant la ville est trespeuplée & tant remplie de marchans, que pourroit estre aucune ville marchande en nostre endroit. C'est une ville bien ample, contenant de circuit pres de trois lieues. Un autre lac bien pres du lac susdit a ses eaux douces, & poissons en grande abondance. Du long de la rive de ces deux lacz se trouvent plusieurs villes.

Lors que les Espaignolz prenoient ladite ville de Mexico, c'estoit l'an cent & quarantième apres la premiere fondation d'icelle: & estoit pour lors le neuvesme Roy appelé Montezuma. C'est chose bien merueilleuse de veoir une ville en si peu d'années accreüe en une si tresgrande amplitude & magnificence.

Quiconque voudra plus particulièrement cognoistre la nature, situation & facons tant de ladite Ville que du territoire d'icelle, nous le renvoyons aux narrations de Ferdinand Cortese: lesquelles se trouveront en un volume appelé le Nouveau Monde, ou Nouus Orbis, & pareillement es volumes des navigations, qui sont imprimez à Venise en langue Italienne.

R